

Iniziativa per sortir da l'energia atomara

In urari fix per la midada

DA LUCAS DEPLAZES / ANR

■ **Cun 108 714 suttascripziuns confermadas han ils verds inoltrà ina iniziativa dal pievel per sortir da l'energia atomara. L'iniziativa che ha per mira da garantir la midada vegn sustegnida d'ina vasta alianza d'organisaziuns da la sanestra.** L'iniziativa – inoltrada dals Verds il venderdi passà a la chanzlia federala – scumonda da construir novas ovras nuclearas e pretenda da limitar il temp da produziun per las ovras atomaras existentas. Cun ina sortida svelta ed en moda ordinada vulan ils verds signalisar claramain la midada tar la produziun e tar il diever d'energia atomara.

Limitar il temp da produziun

L'iniziativa saja fitg urgenta perquai ch'il cussegl federal n'haja betg limità il temp da produziun da las ovras atomaras. Cun sia strategia d'energia 2050 veglia la regenza bain sortir da l'energia atomara, senza dentant fixar in urari cler per la midada, ha criticà la cussegliera naziunala bernaisa *Regula Rytz*. Mo in datum fixà per la sortida da las singulas ovras atomaras dettia la segirtad da

planisaziun per las investiziuns en sistems da produziun d'energia regenerabla, ha punctuà la co-presidenta dals verds. In datum fixà lubeschia plinavant als responsabels da planisar e da metter ord funcziun ils stabiliments existents. La confederaziun quintia cun in temp da manaschi da 50 onns. Ins stoppia dentant constatar che il temp da manaschi vegnia adina puspè prolungà sut squitsch da la politica e dals possessurs dals manaschis. Vegniss l'ovra atomara da Leibstadt serrada pir l'onn 2045 – tenor in scenari da la ministra d'energia *Doris Leuthard* – muntass quai in temp da manaschi da 60 onns. En la strategia dal cussegl federal na sajan nagins termins da metter ord funcziun las singulas ovras atomaras fixads, ha deplorà Rytz. Quai confermia ils quitads dals verds ch'il cussegl federal veglia spustar la sortida atomara. Ina prolungaziun dals vegls implants nuclears muntass in grond ristg da segirezza per la populaziun e fiss inacceptabla, ha sincerà la co-presidenta dal comité d'iniziativa.

En quest senn è l'iniziativa che pretenda in temp da produziun da maximum 45 onns per implants nuclears ina rait

da segirezza cunter ils ristgs da l'energia d'atom, ha fatg attent Rytz.

La Svizra ha in grond potenzial

Sin la dumonda da l'anr, sch'ils verds disponian er d'in urari da remplazzament da l'energia nucleara il mument ch'ils singuls implants vegnan mess ord funcziun, ha confermà il cusseglier naziunal turitgais *Bastien Girod* che la Svizra disponia d'in grond potenzial e ch'ella saja sin buna via da remplazzar il manco nuclear cun energias regenerablas. En dus scenaris hajan ils verds demussà detagliadamain co ch'ins possia remplazzar l'energia nucleara a temp cun energias regenerablas. Quai saja pussaivel d'augmentar las energias regenerablas sin 40% en l'interval dals proxims 20 onns, è Girod persvas. Noss urari lubiss da serrar tut las ovras nuclearas sunter 45 onns da produziun. Las ovras da Mühleberg e da Beznau 2 vegnissan prendidas da la rait gia l'onn 2017 e Leibstad l'onn 2029. En quest connex vulan ils verds er cuntanscher las finamiras per proteger il clima e refusan categoricamain la construcziun dad ovras d'energia da gas.